

# Amarabiro yo mu gatabu k'ikoraniro ry'Ubuzima bwacu n'igikorwa cacu

## 3-9 RUSAMA

**UBUTUNZI BWO MW'IJAMBO  
RY'IMANA | GUHARŪRA 27-29**

**“Niwigane ukutagira nkunzi  
kwa Yehova”**

**w13 15/6 10 ing. 14**

**Duhe agaciro cane kamere  
za Yehova**

<sup>14</sup> Abo bigeme batanu bavukana baregereye Musa bamubaza bati: “Kubera iki izina rya data ryokurwa hagati mu muryango wiwe ngo ni uko ataronse umuhungu?” Bamwinginze bati: “Enda nduhe itongo twigabira hagati muri bene wabo na data.” Musa yoba yaciye ababwira ati: ‘Itegeko ribwirizwa gukurikizwa uko riri?’ Oya, yaciye “ashikiriza ikibazo cabo imbere ya Yehova.” (Guh. 27:2-5) None Yehova yishuye iki? Yabwiye Musa ati: “Abakobwa ba Zelofehadi bavuga vyo. Ubwirizwa kubaha intoranza bigabira hagati ya bene wabo na se, kandi uze ubahe intoranza ya se.” Yehova yarashitse kure. Ico kintu yari avuze yaciye agihindura itegeko, mu kubwira Musa ati: “Niha-gira umugabo apfa ataronse umuhungu, muze muhe umukobwa wiwe intoranza yiwe.” (Guh. 27:6-8; Yos. 17:1-6) Kuva ico gihe, abakobwa b'Abisirayeli bose boshikiwe n'iyi ngo-rane nyene bokingiwe.

**w13 15/6 11 ing. 15**

**Duhe agaciro cane kamere  
za Yehova**

<sup>15</sup> Mbega ingingo iranga ubuntu n'ukutagira nkunzi! Abo bakobwa bari bigorewe, Yehova yabafatanye icubahiro nk'uko yafata Abisirayeli ivyabo vyari vyifashe neza kuruta. (Zab. 68:5) Iyo ni imwe gusa mu nkuru nyinshi zo muri Bibiliya zishira ahabona uku kuri gukora ku mutima: Yehova afata kumwe abasavyi biwe bose.—1 Sam. 16:1-13; Ivyak. 10:30-35, 44-48.

**w13 15/6 11 ing. 16**

**Duhe agaciro cane kamere  
za Yehova**

<sup>16</sup> Dushobora gute kwigana Yehova mu bijanye no kutagira nkunzi? Uri-buka yuko kutagira nkunzi birimwo ibintu bibiri. *Nitwaba* tutagira nkunzi ni ho gusa *tuzofata* abandi kumwe. Ni ivy'ukuri ko twese dukunda kwi-yumvira ko turi abantu badahengama kandi batagira nkunzi. Ariko rero, ushobora kuba wemera ko bitama vyoroshe gusuzuma inyiyumvo zacu ata ho duhengamiye. Twokora iki none kugira ngo tumenye nimba turi abantu batagira nkunzi? Igihe Yezu yipfuzaga kumenya ivyo abantu bavugaga ku bimwerekeye, yabajije abagenzi biwe yizigira ati: “Abantu bavuga ko

Umwana w’umuntu ari nde?” (Mat. 16:13, 14) Ubona gute wiganye Yezu muri ivyo? Woshobora kubaza umugenzi ubona ko acisha aho ukuri kuri kugira ngo akubwire nimba abandi babona ko uri umuntu atagira nkunzi. Ukwiye gukora iki nimba akubwiye ko hari ukuntu usa n’uwugira nkunzi ufatiye ku bwoko, ku kibanza abantu bafise mu kibano canke ku butunzi? Nusenge Yehova ubigiranye ubwira ku bijanye n’inyiyumvo zawe, umwinginge agufashe kugira ico uhinduye ku gatima ufise kugira ngo urushirize kumwigana mu bijanye no kutagira nkunzi.—Mat. 7:7; Kol. 3:10, 11.

## **Ducukure ubutunzi bwo muri Bibiliya**

### ***it-2 850 ing. 1* Amashikanwa**

***Amashikanwa y’ikinyobwa.*** Amashikanwa y’ikinyobwa yatangwa ari kumwe n’ayandi mashikanwa atari make, na canecane inyuma y’aho Abisi-rayeli bamariye kwinjira mu Gihugu c’isezerano. (Gh 15:2, 5, 8-10) Iryo shikanwa waba ari umuvinyu (“inzo-ga iboreza”) kandi ryasukwa ku gicaniro. (Gh 28:7, 14; gereranya na Kv 30:9; Gh 15:10.) Intumwa Paulo yandikiye abakirisu b’i Filipi ati: “Naho nyene ndiko ndasukwa nk’ishikanwa ry’ikinyobwa ku kimazi no ku gikorwa gikorwa abantu ari na

vyo ukwizera kwabashikanyeko, ndahimbawe.” Ng’aho yakoresheje ikigeranyo c’ishikanwa ry’ikinyobwa kugira yerekane icipfuzo yari afise co kwitanga cane ku bw’abakirisu bagenziwe. (Fp 2:17) Imbere gato y’uko Paulo apfa, yandikiye Timoteyo ati: “Ubu ndiko ndasukwa nk’ishikanwa ry’ikinyobwa, kandi igihe c’ukubohorwa kwanje kirashitse.”—2Tm 4:6.

## **10-16 RUSAMA**

### **UBUTUNZI BWO MW’IJAMBO RY’IMANA | GUHARŪRA 30-31**

#### **“Nushitse indagano wagize”**

#### ***it-2 1164***

#### **Indagano**

Indagano ugira ku bushake ariko ugategerezwa kuyishitsa umaze kuyigira. Indagano zagirwa ku bushake. Yamara igihe umuntu agize indagano, itegeko ry’Imana ryamusaba kuyishitsa. Ku bw’ivyo bivugwa ko indagano yari ‘iboheye ku buzima bwiwe,’ bikaba vyasobanura ko atanze ubuzima bwiwe bwite nk’ingwati yuko azoshitsa ivyo asezeranye. (Gh 30:2; raba kandi Rm 1:31, 32.) Kubera ko umuntu aba ashobora kuhasiga ubuzima, biratahuritse igituma Ivyanditswe bimusaba kwiyubara cane imbere y’uko agira indagano, akazirikana yitonze ivyo asabwa gushitsa. Itegeko ryagira riti: “Niwaraganira indagano Yehova Imana . . .

[nta]zobura kuyikwishuza, bikakubera igicumuro. Mugabo uretse kugira indagano, ntibizokubera igicumuro.” —Gus 23:21, 22.

## **it-2 1164**

### **Indagano**

Ni ugusezeranira Imana ata gufya yuko uzokora ikintu kanaka, ko uzotanga ishikanwa canke ingabire kanaka, ko winjiye mu murimo kanaka canke ko uzokwirinda ibintu bimwe-bimwe ubwavyo bidateye kubiri n’amategeko. Indagano ni ikintu umuntu agira avyishakiye. Kubera ari ikintu umuntu asezerana ata gufya, indagano yari ikomeye cokimwe n’indahiro kandi rimwe na rimwe izo mvugo zibiri muri bibiliya ziboneka ziri kumwe. (Gh 30:2; Mt 5:33) “Indagano” irimwo n’ibindi uretse ivyo umuntu avuga ko yiyemeje, mu gihe “indahiro” ari amajambo umuntu avugira imbere y’ubukuru buri hejuru kugira ashingire intahe ukuri kanaka, canke kugira yemeze ko agiye gushitsa ivyo yasezeranye. Indahiro akenshi yajana no kwemeza isezzerano.—It 26:28; 31:44, 53.

## **w04 1/8 27 ing. 3**

### **Ibikurubikuru vyo mu gitabu co Guharūra**

**30:6-8—Umugabo mukirisu yoba ashobora gukuraho indagano umukenyezi wiwe yagize?** Ku bijanye n’i-

ndagano, ubu Yehova azigirana n’abasavyi biwe umwe wese ukwiwe. Nk’akarorero, kwiye gurira Yehova ni indagano umuntu agira ku giti ciwe (Ab’i Galatiya 6:5). Umunega nta burenganzira afise bwo gukuraho indagano nk’iyo. Ariko rero, umukenyezi akwiye kwirinda kugira indagano iteye kubiri n’Ijambo ry’Imana canke iteye kubiri n’amabanga ajejwe ku munega wiwe.

### **Ducukure ubutunzi bwo muri Bibiliya**

## **it-2 1203 ing. 4**

### **Yefuta**

Rimwe na rimwe abantu baregurirwa umurimo wa Yehova ku rusengero. Abavyeyi bari bafise uburenganzira bwo kubigirira abana babo. Samweli ni umwe mu babigiriwe. Imbere y’uko nyina wiwe Hana amuvyara, yarasezeranye biciye ku ndagano yuko yomutanze ku bw’ibikorwa vy’itaberenakulo. Na Elikana umugabo wiwe yarashigikiye iyo ndagano. Samweli akimara gucuka, Hana yaciye amutanga kw’itaberenakulo hamwe n’ikimazi c’igitungwa. (1Sm 1:11, 22-28; 2:11) Samusoni ni uwundi mwana yeguriwe mu buryo budasanze igikorwa c’Imana c’Ubunaziri.—Abc 13: 2-5, 11-14; gereranya ubukuru sebibondo afise ku mukobwa wiwe nk’uko bivugwa mu Gh 30:3-5, 16.

## 17-23 RUSAMA

### UBUTUNZI BWO MW'IJAMBO RY'IMANA | GUHARŪRA 32-33

**“Mwirukane ababa muri ico  
gihugu bose”**

**w10 1/8 23**

**Woba wari ubizi?**

**‘Ibitabo vyo ku mpinga z’imisozi’  
bikunze kuvugwa mu Vyanditswe  
vy’igiheburayo vyari ibiki?**

Igihe Abisirayeli bari begereje kwinjira mu Gihugu c’Isezerano, Yehova yababwiye ngo baze bazimanga-nye ibibanza vyose vyo gusengamwo vy’Abanyakanani baba muri ico gihugu. Imana yabategetse iti: “Muze . . . mumenagure ibibuye vya-bo vyose bikorogoshoyekw ibishushanyo, mumenagure n’ibishushanyo vyabo vyose vyavugutiwe mu nkero, mukomvomvore ibitabo vyabo vyose vyo ku mpinga z’imisozi.” (Guharūra 33:52) Ivyo bibanza vyaberamwo ugusenga kw’ikinyoma bishobora kuba vyari ibibanza bitubakiwe biri ku mpinga z’imisozi canke bikaba ari ibibanza vyubatswe bikirurutse biri ahandi hantu, nko munsy’ibiti canke mu bisagara. (1 Abami 14:23; 2 Abami 17:29; Ezekiyeli 6:3) Warashobora gusanga hari ibicaniro, inkingi nyeranda, ibishushanyo, ivyoserezwakwo imibavu be n’ibindi bintu bijanye n’ugusenga.

**w08 15/2 27 ing. 5-6**

**Tugire ico twigiye ku makosa  
y’Abisirayeli**

Muri iki gihe, duhangana n’ingorane nyinshi zisa n’izo Abisirayeli bari bafise. Ikibano ca none kirafise ibigirwamana vyinshi gisenga. Harimwo amahera, ba rurangiranwa mu vyo kunezereza abantu, mu vy’inkino, politike, abakuru b’amadini bamwe-bamwe, eka mbere n’abo mu bagize umuryango. Ico ari co cose muri ivyo coshobora kuba ico twibandako mu buzima. Gutsimbataza ubucuti bwa somambike n’abantu badakunda Yehova birashobora kudushikana ku gutemba mu vy’impwemu.

Ubushegabo ni wo muce nyamukuru ujanye no gusenga Bayali wakwegakweze Abisirayeli benshi. Imitego isa n’iyo hari abo yirahira mu basavyi b’Imana. Nk’akarorero, umuntu yinjiye mu muhora kanaka wa internet, akabigira yibereye ahiherereye mu nzu iwe, ico conyene kirashobora kuba gihagije kugira ngo yonone ijwi ryiwe ryo mu mutima, kubera yakwezwe n’urusaku canke atiyubaye. Ese ukuntu vyoba bibabaje mu gihe umukirisu yokwegakwegwa n’amashusho yo kuri internet yerekana ubushegabo!

**it-1 392 ing. 4**

**Kanani**

Yosuwa abigiranye ubukerebutsi, “nti-

yakuyeko ijambo na rimwe mu vyo Yehova yari yategetse Musa vyose” ku bijanye no gutikiza Abanyakanani. (Yos 11:15) Ariko Abisirayeli ntibakurikije akarorero kiwe keza kandi ntibakuyeho buhere icatuma igihugu gihumana. Kuba Abanyakanani babandanije kubana n’Abisirayeli, uko igihe cahaca vyaragize akosho ku Bisirayeli ku buryo ata gukeka hapfuye abantu benshi kuruta abari gupfaye iyo bagamburuka badahemuka itegeko ryo gukuraho Abanyakanani (aho ntituvuze ubugizi bwa nabi, ubuhumbu no gusenga ibigirwamana). (Gh 33:55, 56; Abc 2:1-3, 11-23; Zb 106:34-43) Yehova yaraburiye Abisirayeli yuko ubutungane bwiwe be n’imana ziwe bitobayemwo nkunzi. Yababwiye ko bishitse bakagiranira ubucuti n’Abanyakanani, bakunga na bo ubucuti bw’ukwabirana, bagasukiranyarugusenga maze bagakurikiza imigenzo yabo ijanye n’ugusenga be n’imico yabo yononekaye, bobaye bikwegeye ata kabuza guhanwa na rya tegeko ryo kuzimanganya Abanyakanani bikanatuma ‘igihugu kibadahwa.’ —Kv 23:32, 33; 34:12-17; Lw 18:26-30; Gus 7:2-5, 25, 26.

## **Ducukure ubutunzi bwo muri Bibiliya**

**it-1 933 ing. 6**

**Akarimbi**

Igihe ubupfindo bwaba bumaze kwe-

rekana aho umuryango kanaka uherereye, vyaba bikenewe rero ko bamenya ubunini bwaho hisunzwe ca kintu ca kabiri, na co akaba ari ukuntu umuryango waba ungana. Dusoma duti: “Muze mwigabanganirize ico gihugu biciye ku bupfindo nk’uko imiryango yanyu iri. Ku muryango munini, muze mwongereze intoranwa yawo, kuri muto na wo muze mugabanye intoranwa yawo. Iyo ubupfindo buzosohoka bwerekana ku bwawo, ni ho hazoba ahawo.” (Gh 33:54) Ubupfindo bumaze kuvuga aho umuryango kanaka uherereye vyaguma ukwo nyene, ariko barashobora kugira ivyo bahinduye ku kuntu intoranwa ingana. Ku bw’ivyo, igihe basanga umugabane wa bene Yuda ari munini cane, itongo ryabo ryaragabanijwe, igice kivuyeko gica gihabwa umuryango wa Simeyoni.—Yos 19:9.

## **24-30 RUSAMA**

### **UBUTUNZI BWO MW’IJAMBO RY’IMANA | GUHARŪRA 34-36**

**“Nuhungire kuri Yehova”**

**w17.11 9 ing. 4**

**Woba uriko urahungira kuri Yehova?**

<sup>4</sup>Vyagenda gute hoho umuntu yishye uwundi bivuye kw’isanganya? Naho ryaba ari isanganya yaragirwa n’amaraso. (Ita. 9:5) Ariko rero

bivuye ku mbabazi za Yehova, uwi-she yarashobora guhungira muri ki-mwe mu bisagara bitandatu vy’ubu-hungiro, kugira umuhozi w’amaraso ntamwice. Agezeyo yaba akize. Uwo muntu yategerezwa kuguma muri ico gisagara c’ubuhungiro gushika umuherezi mukuru apfuye.—Guh. 35: 15, 28.

### **w17.11 9 ing. 6**

#### **Woba uriko urahungira kuri Yehova?**

<sup>6</sup> Uwaba yishe umuntu kw’isanga-nya, yategerezwa guca aja kw’ire-mbo ry’igisagara yaba ahungiyemwo, “[akavuga] ivyiwe abagabo b’inararibonye b’ico gisagara bumva.” Bategerezwa kumwakira neza. (Yos. 20:4) Haciye igihe, baramurungika kubonana n’abagabo b’inararibonye bo mu gisagara yakoreyemwo igicumuro, maze bakihweza urubanza rwiwe. **(Soma Guharūra 35:24, 25.)** Bemeje ko yishe umuntu kw’isanga-nya, ni ho gusa yashobora gusubira muri ico gisagara c’ubuhungiro.

### **w17.11 11 ing. 13**

#### **Woba uriko urahungira kuri Yehova?**

<sup>13</sup> Uwahunze amaze gushika mu gisagara c’ubuhungiro, yaba akize. Ku bijanye n’ivyo bisagara, Yehova yavuze ati: “Bize bibabere aho guhungira.” (Yos. 20:2, 3) Yehova ntiyasaba ko uwishe umuntu atabishaka asubi-

ra gucirwa urubanza kuri ico caha nyene, eka kandi umuhozi w’amaraso ntiyashobora kwinjira muri ico gisagara ngo yihore uwo muntu. Uwahunze rero ntiyigera atinya ko hogira uwoza kumwihora. Amaze gushika muri ico gisagara, yarumva atekanye kuko yaba akingiwe na Yehova. Ubwo buhungiro ntiriyari *ibohero*. Muri ico gisagara umuntu yarashobora gukora, gufasha abandi, no gukorera Yehova ataco yinona. Yarashobora kugira ubuzima bwiza kandi buhimbaye.

#### **Ducukure ubutunzi bwo muri Bibiliya**

### **w91 15/2 13 ing. 13**

#### **Incungu y’indinganire ku bwa bose**

<sup>13</sup> Yamara yaba Adamu canke Eva, nta n’umwe yungukira ku ncungu. Itegeko rya Musa ryarimwo ingingo ngenderwako igira iti: “Ntimuze mwakire incungu yo gucungura umwicanyi akwiriye gupfa.” (Guharūra 35:31) Kubera ko Adamu atahenzwe, yacumuye rero n’ibigirankana. (1 Timoteyo 2:14) Ni nk’aho ari we yishe abomukomotseko. Kubera ko yabaraze ukudatungana, vyatumye bacirwa urwo gupfa. Biragaragara ko Adamu yari akwiriye gupfa. Kubera ko yari umuntu atunganye, yahisemwo kugambarara itegeko ry’Imana n’ibigirankana. Yehova yari kuba

aciye kubiri n’ingingo ngenderwako ziwe zigorotse iyo areka Adamu akungukira ku ncungu. Naho ari ukwo, kuriha impembo y’igicumuro Adamu yakoze vyotumye urubanza rwo gupfa rwaciriwe abomukomotseko rukurwaho. (Abaroma 5:16) Biciye ku ncungu, Yehova yarashitse ku muzi w’ingorane maze aratuma bishoboka ko ingaruka zibabaje z’igicumuro zivaho burundu mu buryo bwemewe n’amategeko. Umucunguzi ‘yahonjereje urupfu umuntu wese’ mu kwikorera ingaruka z’igicumuro zoshikiye abana ba Adamu bose.—Abaheburayo 2:9; 2 Abakorinto 5:21; 1 Petero 2:24.

## **31 RUSAMA–6 RUHESHI**

### **UBUTUNZI BWO MW’IJAMBO RY’IMANA | GUSUBIRA MU VYAGEZWE 1-2**

**“‘Urubanza ni urw’Imana’”**

**w96 15/3 23 ing. 1**

**Yehova arakunda ubugororotsi  
n’ubutungane**

Abakurambere bagenywe mw’ishengero babwirizwa guca imanza z’ibicumuro bikomeye. (1 Abakorinto 5: 12, 13) Mu bihe nk’ivyo, baribuka ko ubutungane bw’Imana burondera kugira imbabazi uko bishoboka kwose. Ariko birashika umucumuzi ntagirirwe imbabazi, nk’akarorero

igihe atigaye. Yamara abakurambere ntibakura umucumuzi mw’ishengero kubera bamubikiye inzika. Barizigira ko guca umuntu mw’ishengero ubwavyo bituma yisubirako. (Gereranya na Ezekiyeli 18:23.) Abakurambere bayobowe na Kristu barashitsa ubutungane, ivyo bikaba bijamwo no kuba nk’“ubwikingo bw’umuyaga.” (Yesaya 32:1, 2) Babwirizwa rero kutagira nkunzi no gukora ibitegereka.—Gusubira mu vyagezwe 1:16, 17.

**w02 1/8 9 ing. 4**

**Nugamburukire Ubukuru  
bw’Imana Udahemuka**

<sup>4</sup> Ariko rero, kuba umucamanza nti-vyasaba gusa kumenya Ivyagezwe. Kubera bari abanyagasembwa, abo bagabo b’inararibonye bategerezwa kuba maso kugira ngo batangire impengamiro mbi izo ari zo zose ubwabo bafise, nk’ubwikunzi, kugira nkunzi be n’umwina, vyashobora gutuma baca urubanza nabi. Musa yababwiye ati: “Ntimuze muce urwa nkunzi, nt’Ariko muze mwumvirize aboroshe n’abahambaye, mubanganye: nti Ntimuze mutinye umuntu ku kigohe, *kukw imanza ar’iz’Imana.*” Emwe, abacamanza ba Isirayeli baca imanza z’Imana. Ese ingene ako kari agateka keza igitangaza!—Gusubira mu Vyagezwe 1:16, 17.

## **Ducukure ubutunzi bwo muri Bibiliya**

**w13 15/9 9 ing. 9**  
**Ivyibutsa vya Yehova**  
**ni ivyo kwizigirwa**

<sup>9</sup>Igihe Abisirayeli batangura urugendo rwahavuye rumara imyaka 40 baba mu “gahinga . . . gateye ubwoba,” Yehova ntiyahaye imbere y’igihe amakuru atomoye ajanye n’ukuntu yobayoboye, akabakingira akongera akababungabunga. Naho vyari ukwo, yaguma yerekana ko bari gushobora kumwizigira bakongera bakizigira ubuyobozi bwiwe. Yehova akoresheje inkingi y’igicu ku murango be n’iyumuriro mw’ijoro, yaribukije Abisirayeli ko yari abafashe mu mugongo uko yabayobora abacisha muri ako karere kagoye kubamwo. (Gus. 1:19; Kuv. 40:36-38) Yarabaronkeje kandi ivya nkenyerwa. “Impuzu zabo ntizashize, kandi ibirenge vyabo ntivyavyimvye.” Emwe, “nta co babuze.”—Neh. 9:19-21.

## **7-13 RUHESHI**

**UBUTUNZI BWO MW’IJAMBO  
RY’IMANA | GUSUBIRA MU  
VYAGEZWE 3-4**

**“Amategeko ya Yehova arangwa  
n’ubukerebutsi n’ubutungane”**

**it-1 1199 ing. 2**  
**Ugutahura**

Kwigana umwete Ijambo ry’Imana n’amategeko yayo be no kubishira mu

ngiro, bituma umuntu agira ugutahura kwimbitse kuruta abigisha biwe, akagira n’ugutegera kuruta abagabo b’inararibonye. (Zb 119:99, 100, 130; gereranya na Lk 2:46, 47.) Ivyo bimeze ukwo kubera vy’ukuri ubukerebutsi n’ugutegera bishingiye ku ngingo nyoboza z’Imana zityoroye be n’ingingo z’ubutungane zayo. Ni co gituma igihe Abisirayeli bagumye bagamburuka badahemuka vyatuma amahanga abakikuje ababona ko ari abantu “bakerebutse kandi bafise ugutegera.” (Gus 4:5-8; Zb 111:7, 8, 10; gereranya na 1Bm 2:3.) Umuntu afise ugutegera aratahura ko adakwiye kurenga kw’Ijambo ry’Imana, akipfuza kubaho aryisunga, akanasenga asaba gufashwa n’Imana. (Zb 119:169) Arareka Ijambo ry’Imana rigashika ibwina muri we (Mt 13:19-23), akaryandika ku gisate c’umutima wiwe (Img 3:3-6; 7:1-4), bigatuma yanka “umunyuro w’ikinyoma wose” (Zb 119:104). Igihe Umwana w’Imana yari kw’isi, yaragaragaje ugutahura muri ubwo buryo, aranka mbere guhunga urupfu rwo ku giti co kubabarizwako kuko vyari ngombwa ko apfa muri ubwo buryo kugira Ivyanditswe biranguke. —Mt 26:51-54.

**w99 1/11 20 ing. 6-7**  
**Igihe hari ugutanga kwa cane**

Igihe umwamikazi yajorezwa n’ivyo yumvise kandi akabona, yishuranye ukwicisha bugufi ati: “Hahiriwe

aba basuku bawe bama bahagarara imbere yawe, bumviriza ubukerebutsi bwawe!” (1 Abami 10:4-8) Naho abasuku ba Salomo bari bakikujwe n’ibihinda, ntiyavuze ko ari vyo vyatuma bahimbarwa. Ahubwo riho, abasuku ba Salomo bari barahezagiwe kubera ko bama bumviriza ubukerebutsi Imana yahaye Salomo. Ese ukuntu umwamikazi wa Sheba ari akarore-ro keza ku basavyi ba Yehova muri iki gihe, abama bungukira ku bukerebutsi bw’Umuremyi ubwiwe no ku bw’Umwana wiwe Yezu Kristu!

Amajambo uwo mwamikazi yabandanije avuga arahambaye. Agira ati: “Yehova Imana yawe ahezagirwe.” (1 Abami 10:9) Bigaragara ko uwo mwamikazi yabona ukuboko kwa Yehova mu gutunganirwa no mu bukerebutsi Salomo yari afise. Ivyo birahuye n’ivyo Yehova yari yasezeraniye Abisirayeli imbere y’aho. Yavuze ko ‘kugumya ingingo nyobozi ziw’ ari “ubukerebutsi n’ugutegera mu maso y’ibisata vy’abantu bizokwumva ivy’izo ngingo nyobozi zose, kandi ntibazobura kuvuga ngo: ‘Iri hanga rikomeye, mu vy’ukuri ni abantu bakerebutse kandi bafise ugutegera.’”—Gusubira mu vyagezwe 4:5-7.

### **w07 1/8 29 ing. 13**

#### **Woba uri “umutunzi ku Mana”?**

<sup>13</sup> Igihe Yehova ahunze imigisha abasavyi biwe, yama abaha ibintu vy-

za gusumba ibindi vyose (Yakobo 1:17). Nk’akarorero, igihe Yehova yaha Abisirayeli ahantu ho kuba, yabahaye “igihugu gitemba amata n’ubūki”. N’aho igihugu ca Misiri na co nyene cigeze kudondorwa muri ubwo buryo, igihugu Yehova yahaye Abisirayeli cari gitandukanye na Misiri n’imiburiburi mu muce umwe uhambaye. Nk’uko Musa yabwiye Abisirayeli, cari “igihugu Uhoraho Imana ya[bo] yāmizak’umutima”. Mu yandi majambo, bosangamvye kubera yuko Yehova yobaye abitwararika. Igihe cose Abisirayeli baguma ari intadohoka kuri Yehova, yarabahezagira cane kandi baragira ubuzima bigaragara ko buruta ubw’abantu bo mu mahanga yose yari abakikuje. Ni vyo koko, umuhezagiro wa Yehova ni wo ‘utungisha’!—Guharūra 16:13; Gusubira mu vyagezwe 4:5-8; 11:8-15.

### **Ducukure ubutunzi bwo muri Bibiliya**

#### **w04 15/9 25 ing. 3**

#### **Ibikurubikuru vyo mu gitabu co Gusubira mu vyagezwe**

**4:15-20, 23, 24**—Itegeko ribuza kwibazira ibishusho ryoba risobanura ko ari bibi guhingura ibishusho canke amasanamu y’ibintu ku bw’intumbero yo gushariza? Oya. Hano, iryo tegeko ryabuza kubaza ibishushanyo ku bwo gusenga, ryabuza

‘kubisenga canke kuvyunamira kibure kubisaba’. Ivyanditswe ntibibuza gukora ibibazano canke guhingura amashusho y’ibintu agenewe gushariza.—1 Abami 7:18, 25.

## **14-20 RUHESHI**

### **UBUTUNZI BWO MW’IJAMBO RY’IMANA | GUSUBIRA MU VYAGEZWE 5-6**

**“Nufashe abana bawe  
gukunda Yehova”**

**w05 15/6 20 ing. 11**

**Bavyeyi, nimuronse umuryango  
wanyu ivyo ukeneye**

<sup>11</sup> Kuri icyo kibazo, ushobora gusanga ata canditswe cyo muri Bibiliya gikunze gusubirwamwo nk’icyo mu Gusubira mu vyagezwe 6:5-7. Turabingizwe muzingurure Bibiliya zanyu maze dusome icyo mirongo. Murabona yuko abavyeyi bakwiye kubanza kwiyubakira mu vy’impwemu, mu gukomeza urukundo bakunda Yehova no mu gushira ku mutima amajambo yiwe. Erega ni vyo, murakeneye gutohoza Ijambo ry’Imana mubigiranye umwete, mu gusoma Bibiliya mudahorereza no mu kuyizirikanako kugira ngo murushirize gutegeza neza no gukunda inzira za Yehova, ingingo ngenderwako ziwe be n’amategeko yiwe. Icyo bizovamwo ni uko umutima wa-

nyu uzokwuzura ukuri kuryoshe kwo muri Bibiliya kuzotuma mugira umunezero, mugatinye Yehova mukongera mukamukunda. Muzoronga ibintu vyiza umuyoro muzokwinjiza mu bana banyu.—Luka 6:45.

**w07 15/5 15-16**

**Nokora iki kugira ngo abana  
banje bagire indero nziza koko?**

Imigambi ufise, ivyiyumviro vyawe, ingingo ngenderwako wisunga, be n’ivyo witwararika, ntibigaragarira gusa mu vyo uvuga, ariko biragarira no mu vyo ukora (Abaroma 2: 21, 22). Kuva abana bakiri bato cane bariga biciye ku kwihweza bitonze abavyeyi babo. Abana barabona ivyo abavyeyi babo baha agaciro, maze akenshi ugasanga ni vyo na bo baheza bagaha agaciro. Nimba ukunda Yehova vy’ukuri, abana bawe baraheza bakabibona. Nk’akarorero, barabona yuko uha agaciro ugusoma Bibiliya n’ukwiyigisha. Baragera aho babona ko ushira imbere ivy’Ubwami mu buzima bwawe (Matayo 6:33). Kwama witaba amakoraniro ya gikirisu no kwama ugira uruhara mu gikorwa cyo kwamamaza Ubwami, birabereka yuko kurangurira Yehova umurimo mweranda ari cyo kintu gihambaye kuruta ibindi vyose kuri wewe.—Matayo 28:19, 20; Abaheburayo 10:24, 25.

**w05 15/6 21 ing. 14**

**Bavyeyi, nimuronse umuryango wanyu ivyo ukeneye**

<sup>14</sup> Nk’uko mu Gusubira mu vyagezwe 6:7 havyerekana, mwebwe abavyeyi murafise uturyo twinshi two kuganira n’abana banyu ibintu vy’impwemu. Mwaba mujanye ahantu, mwaba muriko mukorera hamwe udukorwa tw’i muhira, canke muriko murisamaza muri kumwe, mwoshobora kuronka uturyo two kuronsa abana banyu ivyo bakeneye mu vy’impwemu. Birumvikana yuko atari ngombwango mwame mucucagira abana banyu amajambo yerekeye ukuri kwo muri Bibiliya. Nimugerageze riho gutuma ibiyago vyo mu muryango biguma ari ivyubaka mu vy’impwemu. Nk’akarorero, ikinyamakuru *Réveil-Illez-vous!* usanga kirimwo ibiganiro vyinshi bivuga ibintu bitari bimwe. Mwene ivyo biganiro vyoshobora gucira inzira ibiyago vyerekeye ibikoko Yehova yaremye, ivyerekeye ahantu hezaheza hirya no hino kw’isi, be n’ivyerekeye ukuntu imico kama y’abantu be n’uburyo babayeho usanga biri mu buryo bunyuranye bimwe vy’akaroruhore. Mwene ivyo biyago vyoshobora gutuma abakiri batobasoma ibindi bitabu vyinshi bitangwa n’umugwi wa wa mushumba wo kwizigirwa w’ubwenge.—Matayo 24:45-47.

**Ducukure ubutunzi bwo muri Bibiliya**

**w19.02 22 ing. 11**

**Urukundo n’ubutungane muri Isirayeli ya kera**

<sup>11</sup> **Ivyigwa:** Yehova ntabona gusa ibiboneka inyuma. Arabona ico vy’ukuri turi mu mutima. (1 Sam. 16:7) Nta na kimwe dushobora kumuhisha, vyaba ivyo twiyumvira, uko twiyumva canke ivyo dukora. Aturonderamwo iciza kandi ashaka ko tugitsimbataza. Ariko yipfuza ko tumenya ivyiyumviro bibi twoba dufise maze tukabirwanya imbere y’uko bidukwegera akarambaraye.—2 Ngo. 16:9; Mat. 5: 27-30.

## **21-27 RUHESHI**

**UBUTUNZI BWO MW’IJAMBO RY’IMANA | GUSUBIRA MU VYAGEZWE 7-8**

**“Ntuze wunge na bo ubucuti bw’ukwabirana”**

**w12 1/7 29 ing. 2**

**Kubera iki Imana yasavye ko abayisenga bubakana gusa n’abo basangiye ukwemera?**

Dufashe iryo hanga muri rusangi, Yehova yari azi ko Shetani yashaka kwonona abasavyi biwe mu gutuma basenga imana z’ikinyoma. Imana

yaciye rero ibagabisha ku bijanye n’abatemera iti: ‘Bazokevyu abahungu banyu bababuze kunkurikira, kandi ntibazobura gukorera izindi mana.’ Ivyo vyogize ingaruka zikomeye. Ihanga rya Isirayeli riramutse rikoreye izindi mana, Imana ntiyobaye ikiritonesha canke ngo irikingire, bigatuma rishobora kugwa mu vyavy’abansi baryo. Wumva none icyo gihe ryoshoboye gukomokamwo Mesiya yari yarasezeranywe? Biratomoye yuko Shetani yari afise imvo yo kwoshya Abisirayeli ngo babirane n’abatemera.

### **w15 15/3 30-31**

#### **Kwubaka “mu Mukama gusa”—Vyoba bikibereye?**

Yamara rero, Yehova yarashize mw’Ijambo ryiwe itegeko ryo kwubaka mu Mukama gusa. Uti kubera iki? Kubera ko azi icobera ciza abasavyi biwe. Uretse ko yipfuzaga gukingira abasavyi biwe ingaruka zishikira abahitamwo ingendo itaranga ubukerebutsi, aripfuzaga n’uko bahimbirwa. Mu misi ya Nehemiya, igihe Abayuda benshi bubakana n’abanyamahanga batasenga Yehova, Nehemiya yarabibukije akarorero kabi ka Salomo. Naho Salomo “[yakundwa] n’Imana yiwe, . . . na we nyene abagore b’abanyamahangakazi baramucumuje.” (Neh. 13:23-26) Imana rero

yadutegetse kwubakana gusa n’abakirisu b’ukuri, ikaba yabigize ku neza y’abasavyi bayo. (Zab. 19:7-10; Yes. 48:17, 18) Abakirisu b’ukuri barakenguruka ukuntu Imana ibitwarikana urukundo maze bakisunga ubuyobozi itanga. Kubera ko bayiyobokera nka yo Mutware, baremera icese ko ari yo Segaba w’ibiriho vyose.—Imig. 1:5.

### **w15 15/8 26 ing. 12**

#### **Tube maso ku bo twifatanya muri iyi misi ya nyuma**

<sup>12</sup> Abakirisu bipfuzaga kwubaka izabo barakwiye kuba maso cane ku bo bifatanye. Ijambo ry’Imana riduhanura ata guca ku ruhande riti: “Ntimubohere ku ngögo hamwe n’abatemera kandi bitajana. Kuko, ubugorotsi n’ubugarariji bihuriye ku ki? Canke umuco usangiye iki n’umwiza?” (2 Kor. 6:14) Abasavyi b’Imana bariko bararondera uwo bazokwubakana, Bibiliya ibahanura kwubaka “mu Mukama gusa.” Ivyo bisobanura kwubakana gusa n’umusavyi wa Yehova yiyeguye kandi yabatijwe, abaho yisunga inyigisho zo mu Vyanditswe. (1 Kor. 7:39) Igihe abakirisu bubakanye n’abo basangiye ukwemerera barironkera abagenzi biyeguriye Yehova kandi bazobafasha kuguma ari intahemuka ku Mana.

## **Ducukure ubutunzi bwo muri Bibiliya**

**w04 1/2 13 ing. 4**

### **Yehova araturonsa ivyo dukeneye ku musi ku musi**

<sup>4</sup> Gusaba ivyo turya ku musi ku musi bikwiye kutwibutsa yuko dukeneye imfungurwa zo mu vy'impwemu ku musi ku musi. Naho Yezu yari ashonje cane inyuma y'aho yari amaze igihe kirekire yisonzesheje, yarananiye inyosha mbi ya Shetani yo guhindura amabuye umukate, mu kuvuga ati: “Vyanditswe ng'Umuntu ntatungwa n'umutsima gusa, arikw atungwa n'ijambo ryose riva mu kanwa k'Imana” (Matayo 4:4). Yezu hano yasubiyemwo amajambo y'umumenyeshakazoza Musa, uwabwiye Abisirayeli ati: “[Yehova] ya[ra]bacishije bugufi, yemera ko musonza, araheza abagaburira manu mutari muzi, na ba sogokuriza banyu batigeze kumenya; kugira ngw abamenyeshe yuk'umuntu adatungwa n'ivyo kurya gusa, arikw atungwa n'amajambo yose ava mu kanwa k'Uhoraho” (Gusubira mu vyagezwe 8:3). Uburyo Yehova yatanze manu ntibwaronkeje Abisirayeli imfungurwa zo mu buryo bw'umubiri gusa, ariko kandi bwarabaronkeje ivyigwa vyo mu buryo bw'impwemu. Kimwe muri ivyo vyigwa ni ic'uko bategerezwa “kwegeranya ivy'uwo musi”. Baramutse begeranije ibirenze

ivyo bakeneye ku musi, ivyaba vyasigaye vyaca bitangura kunuka hanyuma bikanyagara inyo (Kuvayo 16:4, 20). Yamara, ivyo ntivyaba ku musi ugira gatandatu igihe bategerezwa kwegeranya ibingana kabiri n'ivyo bahora batora ku musi ku musi kugira ngo bironse ivyo bakeneye kw'Isabato (Kuvayo 16:5, 23, 24). Ku bw'ivyo, manu yarabibutsa mu buryo bukomeye yuko bategerezwa kugamburuka be n'uko ubuzima bwabo butari buhagaze gusa ku vyo kurya, ariko ko bwari buhagaze ku “majambo yose ava mu kanwa k'Uhoraho”.

## **28 RUHESHI-4 MUKAKARO**

### **UBUTUNZI BWO MW'IJAMBO RY'IMANA | GUSUBIRA MU VYAGEZWE 9-10**

**“Hari ikindi Yehova Imana yawe agusaba?”**

**w09 1/10 10 ing. 3-4**

### **Ni ibiki Yehova adusaba?**

Ni igiki cotuvyurira umutima wo kugamburukira Imana tubikunze? Musa aravuga ikintu kimwe, ati: “Ukumwubaha.” (Umurongo wa 12) Nimba twubaha Imana bimwe bigera kure, tuzogerageza kwirinda kutayihimbara.

Ariko none, ni igiki ahanini gikwiye gutuma tugamburukira Imana? Musa avuga ati: ‘Mukunde [Yehova] kandi

mumukorere n'imitima yanyu yose n'ubugingo bwanyu bwose.' (Umurongo wa 12) Gukunda Imana nti bigarukira gusa ku nyiyumvo. Igita-bu kimwe gisigura giti: "Amavuga yo mu giheburayo yerekeye inyiyumvo rimwe na rimwe usanga yerekeza no ku bikorwa izo nyiyumvo zica zituma umuntu akora." Ico gitabu nyene kivuga ko gukunda Imana bisobanura "*gukora* ubigiranye urukundo" ku bwayo. Mu yandi majambo, nimba dukunda vy'ukuri Imana, tuzokora ibintu mu buryo tuzi ko buyihimbara.—Imigani 27:11.

## **w09 1/10 10 ing. 6**

### **Ni ibiki Yehova adusaba?**

Nitwagamburuka tubikunze, bizotuma turonka imihezagiro. Musa yandika ati: "[Mwitondere] ivyagezwe . . . mbageze uyu musu kugira ngo umemererwe neza." (Umurongo wa 13) Ego cane, icagezwe cose ca Yehova, ni ukuvuga ikintu cose adusavye, agitanga ku bw'ineza yacu. None ivyo vyoba bitangaje? Bibiliya ivuga ko "Imana ari urukundo." (1 Yohani 4:8) Ku bw'ivyo, yatanze gusa ivyagezwe bituma twironkera ukumererwa neza kuramba. (Yesaya 48:17) Nitwakora ivyo Yehova adusaba vyose, bizoturinda imibabaro myinshi muri kino gihe maze bituyobore ku mihezagiro y'ibihe bidahera tuzoronka igihe tuzoba dutegekwa n'Ubwami bwiwe.

## **c/ 16 ing. 2**

### **Woba vy'Ukuri Ushobora 'Kwiyegereza Imana'?**

<sup>2</sup> Aburahamu, uwabayeho mu bihe vya kera, ni umwe mu bantu binovoye ubucuti mwene ubwo. Yehova yavuze ko uwo sekuruza w'imiryango ari "umukunzi w[iwe]." (Yesaya 41:8) Egome, Yehova yafata Aburahamu ko ari umukunzi somambike. Aburahamu yashoboye kwunga ubwo bucuti bwa somambike kubera yuko "yizeye Imana." (Yakobo 2:23) No muri iki gihe nyene, Yehova ararondera uturyo two 'gushira umutima' ku bamukore-ra babitumwe n'urukundo. (Gusubira mu Vyagezwe 10:15) Ijambo ryiwe riduhimiriza riti: "Mwiyegereze Imana, na yo izobegera." (Yakobo 4:8) Muri ayo majambo turasangamwo ubutumire n'umuhango.

### **Ducukure ubutunzi bwo muri Bibiliya**

#### **it-1 115**

#### **Abanakimu**

Bwari ubwoko bw'abantu bafise igihagararo c'akataraboneka, baba mu karere k'imisozi ya Kanani no mu burere bumwebumwe bwo ku nkenge-ra y'ikiyaga, canecane amaja mu bu-manuko. Abagabo batatu bakomakomeye b'Abanakimu ari bo Ahimani, Sheshayi na Talimayi barigeze ku-ba i Heburoni. (Gh 13:22) Aho ni ho

ba batasi 12 b'Abaheburayo babonye Abanakimu ari bwo bwa mberere. Cumi muri abo batatsi bazanye inkuru iteye ubwoba yerekeye abo bagabo. Bavuze yuko bakomoka ku Banefilimu b'imbere y'umwuzure be n'uko bigereranije na bo, Abaheburayo bari bameze nk' "uduhori." (Gh 13:28-33; Gus 1:28) Igihagararo cabo kidasanzwe ni na co bafatirako mu kudondora abagabo b'ibigatanya b'Abemimu n'Abarefayimu. Biboneka ko ubukomezi bwabo ari bwo bwavuyemwo imvugo y'akagani igira iti: "Ni nde ashobora guhagarara ashikamye imbere ya bene Anaki?"—Gus 2:10, 11, 20, 21; 9:1-3.

